

**Illersornissaqarfiup sulisui pillugit inatsisip allangorneranut inatsisit aalajangersimasut
Kalaallit Nunaannut atuutilernissaat pillugit kunngip peqqussutaatigut
atuutilersinneqarnissaa Namminersorlutik Oqartussat akuersaarsinissaat pillugu Inatsisartut
aalajangiiffigisassa**

(Nunanut Allanut Nukissiuuteqarnermullu Naalakkersuisoq)

Saqqummiussissut

(Nunanut Allanut Nukissiuuteqarnermullu Naalakkersuisoq)

Siullermeerineq

Naalakkersuisut sinnerlugit, nuannaarutigalugu, aalajangiiffigisassatut siunnersuut illersornissaqarfiup sulisui pillugit inatsisip allangorneranut inatsisit aalajangersimasunut tunngasoq saqqummiuppara. Allanguinerup siunertaraa Illersornissaqarfiup sulisui tamarmik assigiinnik atugaqarnissaasa qulakkeerneqarnissaa, naalagaaffeqatigiinnermi sorlermi inatsit pineqartunut atuunnersoq apeqqutaatinnagu. Kunngip peqqussutaata sorsunneqalissappat ajornartoortoqassappalluunniit, tamassumunnga ilanngullugu ajunaarnersuaq pinngortitat imminnit pilersitaat il.il., illersornissaqarfiup sulisunik aggersaasinnaaneranut periarfissaa annertusassavaa.

Kunngip peqqussutaa illersornissaqarfimmi sulisunut aallartinneqarsimasunut tapiissutinut soraarnerussutisiatut ittunut aammalu anniarnermut qasilisoornermullu ajunngitsorsiassanut tunngassuteqarpoq. Allanguutit aamma sulisut aallartitaasimasut akornanni aningaasanik taarsiiffigitinnissaannut naligiissaarissapput.

Kunngip peqqussutaa aamma tamakkiisumik illersornissap siuarsarnissaa sakkutooqatigiinnillu upalungaarsimasussanik pilersitsinissami allanguutinik malitseqarpoq; tassa ajornartoornerni immikkut ittuni illersornissaqarfiup sulisussanik pisariaqartinneqartunik pissarsinissaanut periarfissaqarnissaata annertusarneqarnissaa.

Tamakkiisumik illersornissap siuarsarneqarnissaa ilaatigut sakkutuujusussaatitaasut qaammatini arfineq-pingasuni ilinniarsimasut angerlartinneqareernerisa kingorna ukiut tallimat iluanni illersornissami tamakkiisumi kiffartuussinissaannut aggersarneqarsinnaanerisigut pissaaq. Tamakkiisumik illersornissami kiffartuussineq annerpaamik qaammatinik arfinilinnik sivisussuseqassasoq piumasaaqatigineqarpoq.

Sakkutooqatigiinnik upalungaarsimasunik ilinniartitsisinnaaneq siuarsaanerlu peqqussutip qularnaassavaa. Pineqartut sakkutooqatigiinnut upalungaarsimasussanut ilaasussatut toqqarneqartut qaammatini arfineq-pingasuni sakkutuutut ilinniakkamik naammassisaqassapput angerlartinneqareernerisalu kingorna ukiut tallimat iluanni sakkutooqatigiinni upalungaarsimasuni kiffartuussinissaannut aggersarneqarsinnaassallutik.

Kiisalu inatsisip kingunerisaanik, Illersornissamut ministereqarfiup iluani ataatsimut katillugit minnerpaamik ukiumi ataatsimi sakkutuutut sulisimasut sorsuttoqarnerani pissutsiniluunniit immikkut illuinnartuni katillugit qaammatini 36-ni sakkutuujusussaataasinnaapput.

Kunngip peqqussutaanut uunga aningaasalersuineq 2018-2023-mi illersornissaq pillugu isumaqatigiissutitigut pissaaq.

Allannguutit uku tunngavigalugit illersornissaqarfimmi sulisut pillugit inatsisip nunatsinnut atuuttup iluarsaannissaa kissaatigineqartoq nalilerneqarpoq. Nunatsinni illersornissaqarfiup sulisui taamaalillutik Danmarkimi Savalimmiunilu illersornissaqarfiup sulisuisa atugaasa assiginik atugaqalissapput.

Taamatut oqaaseqarlunga Naalackersuisut sinnerlugit immikkoortoq Inatsisartuni suliassanngorlugu tunniuppara.